



Sambanwá

GIYA SA PAGESAMBA KAN BANWAAN NIN DIÓS

IKADUWANG DOMINGO KAN PASCUA KAN PAGKABUHAY-LIWAT
(o nin Diósnon na Pagkaherak)

16 ABRIL 2023 • PUTI

RITO SA PAGPOÓN

Pataratara

C — Kita inaapodan gabos na magkaboronyog sa pagtubod asin pagtao nin tunay na pagsaksi sa pagtubod na ini na inakò niato bilang diósnon na balaog. Sa liturgia na satong ipagecelebrar ipinapagromdom sato na kaipuhan niatong pakusogon an pagtubod ki Cristo asin akoon siya nin odok sa boót.

Antifona sa Paglaog

(1 Ped 2, 2) (Tindog)
(Sinambit kun mayo nin Awit sa Paglaog)

Siring sa mga bâgong namundag na omboy, madonong, daing pagsagin-sagin kamo maghidaw kan gatas, tanganing saiya magtalubo kamo sa kaligtasan, allelúia.

Pagpangurus asin Pagtaong-galang

P — Sa ngaran kan Amâ, asin kan Aki, asin kan Espiritu Santo.
B — Amen.
P — An Kagurangnan mapasaindo.
B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Diós na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Diós.

P — Maherak man lugod sato an Diós na makakamhan asin, pakapatawada an satong mga kasâlan, darahon kita sa buhay na daing kasagkoran.
B — Amen.

Kyrie

P — Kagurangnan, maherak ka.
B — Kagurangnan, maherak ka.
P — Cristo, maherak ka.
B — Cristo, maherak ka.
P — Kagurangnan, maherak ka.
B — Kagurangnan, maherak ka.

Kamurawayan

Gabos — Kamurawayan sa Diós sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Diós, Hadeng langitnon, Diós Amang makakamhan. Kagurangnan Aking Bogtong, Jesu Cristo, Kagurangnan na Diós, Cordero kan Diós, Aki kan Amâ, ika na nagpaparâ kan mga kasâlan kan kinâban, kaheraki kami; ika na nagpaparâ kan mga kasâlan kan kinâban, akoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

Colecta

P — Mamibi kita.

O Diós nin daing-sagkod na pagkaherak, ika na nagpapalaad kan pagtubod nin banwaan na pinabanal para saimo sa tabang mismo kan fiesta pascual, pataluboa an biyaya na itinao mo, tanganing an gabos makasabot kan maninigong donong na huli kaini sainda nahugasan kan tubig nin bonyag, namundag giraray sa kalag, tinubos kan dugo. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.
B — Amen.

LITURGIA KAN TATARAMON

Enot na Babasahon (Tukaw)
(Gibo 2, 42-47)

An enot na babasahon nagpapahayag kan pagkasararô kan mga enot na Cristiano. Sinda nagdanay sa pagsabuhay kan mga katukdoan kan mga Apostoles, sa pagbaak kan tinapay asin pagpamibi.

Pagbasa sa Mga Gibo kan mga Apostoles

Nagpapakaimbod sinda sa katukdoan kan apostoles asin sa paropakinaabang, sa pagbaak kan tinapay asin sa mga pamibi. Igwa nin pagkatakot an gabos; dakul an ngangalasan saka tanda na nahaman huli kan apostoles. An gabos na nagtutubod sararô, asin an gabos nindang rogaring pinaparo-pakinabangan; an mga pagsadiri saka mga rogaring ipinapabakal ninda asin bina-barangâ-bangâ sa gabos susog sa pangangaipo kan lambang sarô. Aroaldaw sarabay sindang nagpapakaimbod sa Templo asin sa pagbaak kan tinapay sa saindang mga harong; naghahiriras-hirasanan nin pagkakan sa dakulang kaogmahan asin kabinian nin puso, nag-oomaw sa Diós asin iginagalang kan bilog na banwaan. Aroaldaw an Kagurangnan an nagdadagdag kan mga iliniligtas sa saindang bilang.

Tataramon kan Kagurangnan.
Gabos — Salamat sa Dios.

Salmo Responsorial

(Salmo 118, 2-4. 13-15. 22-24)

S — Magpasalamat sa Kagurangnan, huli ta siya marahayon, ta an saiyang pagkaherak sagkod pa man.

1. Magsabi ngonian an Israel:
“Sagkod pa man an saiyang pagkaherak!” Magsabi ngonian an harong ni Aaron:
“Sagkod pa man an saiyang pagkaherak!” Magsabi ngonian an may mga pagkatakot sa KAGURANGNAN: “Sagkod pa man an saiyang pagkaherak!”. (S)

- Dinaguso akong dinaguso na matumba, alagad an KAGURANGNAN, tinabangan ako. Kusog ko asin awit an KAGURANGNAN; siya an nagikong kaligtasan. Kurahaw nin kaogmahan asin kaligtasan sa mga tolda nin mga suripot: "An tóong kamot kan KAGURANGNAN nanggana!" (S)
- An gapô na isinikwal kan mga paratugdok nagin pamayó kan sarigan na gapô; huli ini sa KAGURANGNAN; ngangalasan sa satong mga mata! Uya an aldaw na ginibo kan KAGURANGNAN; ikurahaw ta asin ipag-ogma! (S)

Ikaduwang Babasahon

(1 Pedro 1, 3-9)

Si San Pablo nagpahayag na sa pagkabuhay-liwat nin Kagurangnan kita tinatâwan man nin bâgong paglaom. Sa paghiras sa gawe nin pagkabuhay-liwat ni Jesu kita man nadadara sa bâgong pagkamundag.

Pagbasa sa Enot na Surat ni San Pedro

Pag-omawon an Diós asin Amâ kan Kagurangnan tang si Jesu Cristo: sa dakula niyang pagkaherak, iminundag niya kita liwat para sa buhay na paglaom huli kan pagkabuhay-liwat ni Jesu Cristo hale sa mga gadan, para sa pamanang mayong kalapaan, mayong digta, dai maluluyos, pamana na itinagama sa langit para saindo, na sa kapangyarihan kan Diós binabantayan huli kan pagtubod para sa kaligtasan na andam ihayag sa huring panahon. Kaya kamo naoogma, bagaman nagkakaipo pa sa dikit na panahon na mapamundô kan manlaen-laen na sugot, tanganing an halaga kan saindong pagtubod, na mas mahalaga kisa nawawarang bulawan na binabalô nin kalayo, magi nindong kaomawan, kamurawayan asin kagalangan, sa Kapahayagan ni Jesu Cristo. Dai nindo siya nahiling, alagad namomòtan; dai nahihiling ngonian, alagad tinutubodan. Kaya naoogma kamo nin dai-masabi asin mamuraway na kaogmahan, ta makakamtan an katuyohan kan pagtubod, na iyo an kaligtasan nin mga kalag.

Tataramon kan Kagurangnan.
Gabos — Salamat sa Dios.

Pagrokyaw

(1 Juan 2, 5) (Tindog)
(Sinambit kun dai inaawit an Alleluia)

Alleluia, alleluia. Nagtubod ka huli ta nahiling mo ako, olay

kan Kagurangnan. Paladan an mga dai nakahiling, alagad nagtubod. Alleluia, alleluia.

Evangelio

(Juán 20, 19-31)

P — An Kagurangnan mapa-saindo.

B — Asin sa saimong espiritu.

P — ✠ Pagbasa kan banal na Evangelio susog ki **San Juán**.

B — **Kamurawayan saimo, Kagurangnan.**

Nagsisinarom na, idtong enot na aldaw kan semana, natatrankahan an mga pintoan kan namumugtakan kan mga disipulos huli sa takot sa mga Judío: uminabot si Jesus na nakatindog sa tahaw asin suminabi sainda: "An katoninongan mapa-saindo!" Pakasabi kaini, ipinahiling niya sainda an saiyang mga kamot asin an hirog. Kaya naogma an mga disipulos pagkahiling sa Kagurangnan. Nagsabi sainda giraray: "An katoninongan mapa-saindo! Siring na ako sinugo kan Amâ, kamo man sinusugo ko." Pakasabi kaini, naghingos siya asin nagsabi sainda: "Akoa an Espiritu Santo. An kiisay man na mga kasâlan na patawadon nindo, pinatawad iyan para sainda; an kiisay man na mga kasâlan na dai nindo patawadon, dai iyan ipinatawad." Si Tomas, sarô kan Dose, idtong inaapod na kambal, dai ninda kaiba kan mag-abot si Jesus. Pigparasabihan siya kan ibang mga disipulos: "Nahiling mi an Kagurangnan." Alagad nagsabi sainda: "Kun dai ko mahiling sa saiyang kamot an tanda kan mga pako asin ikalaog an sakong murô sa tanda kan mga pako asin ikalaog an sakong kamot sa saiyang hirog, dai ako matubod." Pakalihis nin walong aldaw, yaon naman sa laog an saiyang mga disipulos asin si Tomas kaiba ninda. Uminabot si Jesus, bararat an mga pintoan: tuminindog sa tahaw asin nagsabi: "An katoninongan mapa-saindo!" Dangan nagsabi ki Tomas: "Daraha digdi an saimong murô asin hilinga an sakong mga kamot; daraha digdi an saimong kamot asin suksokan sa sakong hirog, dai ka magpakamayong pagtubod kundi magmambod." Nagsimbag si Tomas: "O, Kagurangnan ko asin Diós ko!" Nagsabi saiya si Jesus: "Huli ta nahiling mo ako, nagtubod ka. Paladan an mga nagtutubod na dai nakahiling." Sa katunayan dakul pang ibang mga tanda an ginibo ni Jesus sa atubang kan saiyang mga disipulos, mga tanda na dai nasusurat sa librong ini; an mga ini isinurat

tanganing magtubod kamo na si Jesus iyo an Mesías, an Aki kan Diós, asin sa pagtubod magkaigwa kamo nin buhay sa saiyang ngaran.

P — Marahay na Bareta kan Kagurangnan.

B — **Pag-omaw saimo Cristo.**

Homilia (Tukaw)

Pagrokyaw

kan Pagtubod (Tindog)

Credo Apostolico

Gabos — Nagtutubod ako sa Diós Amang makakamhan, Kaglalang kan langit asin dagâ, asin ki Jesu Cristo, Aking bogtong niya, Kagurangnan ta,

(Sa mga minasunod na tataramon, abot sa asin nani-tawo, an gabos minaduko.)

ipinangidam huli kan Espiritu Santo, namundag ki Virgen María, pinasakitan kan panahon ni Poncio Pilato, ipinako sa cruz, nagadan, asin ilinubong, huminilig sa mga gadan, kan ikatolong aldaw nabuhay-liwat hale sa mga gadan, suminakat sa kalangitan, nagtutukaw sa tóo kan Diós Amang makakamhan, hale duman mabalik sa paghukom sa mga buhay asin mga gadan. Nagtutubod ako sa Espiritu Santo, sa banal na Simbahan na catolico, sa paropakinaabang nin mga santos, sa pagpatawad nin mga kasâlan, sa pagkabuhay-liwat nin laman, sa buhay na daing kasagkoran. Amen.

Pamibi nin Banwaan

P — Tiripon bilang banwaan kan Diós, may pagsarig kitang mamibi para sa pagtalubo nin pagtubod asin maghagad kan saiyang tabang sa satong pakipagtusayan sa kakulangan nin paglaom.

S — **Kagurangnan, hinanyoga an samong pamibi.**

- Tanganing an Simbahan danay na magsunod kan halimbawa ni Jesus sa paghingowa na an kinâban magmangno sa mga dukhâ asin sa mga inaapi, ipamibi niato sa Kagurangnan. (S)
- Tanganing an pamuhay-buhay niatong nagkatiripon sa pagtubod magpahiling sa gibo asin ugali kan pagtubod na pinapahayag niato sa ngosò, ipamibi niato sa Kagurangnan. (S)
- Tanganing sa buhay na ini, mag-ogma kita sa katoninongan ni Cristong nabuhay-liwat, katoninongan na dai ikakatao kan kinâban, ipamibi niato sa Kagurangnan. (S)

4. Tanganing an mga naghehelang sa satong comunidad maranga sa saindang pagsakit asin kulog huli kan pagmangno nin mga nag-aataman sainda, ipamibi niato sa Kagurangnan. (S)
5. Tanganing an mga gadan mag-ako kan kapanoan nin buhay na pinanugâ ni Jesu sa gabos na nagtutubod sa saiyang tataramon, ipamibi niato sa Kagurangnan. (S)

P — O Diós samuyang Amâ, hinanyoga an samong pakimaherak. Dai man lugod kami mawâran nin paglaom huli kan samong mga kaluyahan mantang nabubuhay kami sa paglaom asin pagsarig na ika danay na uya samo. Huli ki Cristo samong Kagurangnan.
B — Amen.

LITURGIA KAN EUCARISTIA

Pagdolot (Tukaw)

(Sinambit kun mayong Awit sa Pagdolot)

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Diós sagkod pa man.**

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Diós sagkod pa man.**

P — (Tindog) Magpamibi kamo, mga tugang; tanganing an sako asin an saindong atang maako man lugod kan Diós Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, nakikimaherak kami, na akoon mo an mga atang kan saimong banwaan (asin saimong mga minundag giraray), tanganing an mga binâgo huli kan pagtubod sa saimong ngaran asin huli kan bonyag, magkamit kan kaogmahan na daing

kasagkoran. Huli ki Cristo samong Kagurangnan.

B — Amen.

Prefacio I sa Pascua kan Pagkabuhay-liwat

An misterio pascual

P — An Kagurangnan mapasaindo.

B — **Asin sa saimong Espiritu.**

P — Iitaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Diós.

B — **Maninigo asin Dapat.**

Totoong maninigo asin dapat, matanos asin nakakaligtas: na ika, Kagurangnan, ipagrokyaw sa gabos na panahon, ata ngani mas mamuraway na iharubay orog nang gayo sa aldaw ini na si Cristo samong Pascua idinolot na sacrificio.

Ta siyang gayo an tunay na Cordero na nagparâ kan mga kasâlan kan kinâban. Sa pagkagadan, rinompag niya an samong kagadanan, asin sa pagkabuhay-liwat, ibinalik an buhay.

Kaya, sa labi-labing kaogmahan kan pascua, nag-oogma an gabos sa bilog na kinâban. Pati ngani an mga langitnon na virtudes asin an mga angeles na potestades, nag-aawit kan himno kan saimong kamurawayan, daing-tapos na nagsasabi:

Gabos — Banal, Banal, Banal an Kagurangnan Diós ni mga hukbô. An langit asin dagâ pano kan Saimong kamurawayan. Hosâna sa kaitaasan. Paladan an minadigdi sa ngaran kan Kagurangnan. Hosâna sa kaitaasan.

Pamibi sa Eucaristia (Luhod)

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Diós Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (Tindog)

P — Natukdoan kan mga nakakaligtas na tugon, asin pinatood kan diónnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kan samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabôtan.

B — Amen.

Pagpahayag kan Katoninongan

P — An katoninongan kan Kagurangnan danay na mapasaindo.

B — **Asin sa saimong espiritu.**

P — Magpatinaraohan kamo nin katoninongan.

Cordero

B — **Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: tawi kami nin katoninongan.**

Pag-alok sa Pagcomunion *(Luhod)*

P — Uya an Cordero kan Dios, uya an nagpaparà kan mga kasàlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong; alagad magtaram ka sana, asin an sakong kalag maomayan.

Antifona sa Comunion

(Cf. Jn 20, 27) (Tindog)

(Sinambit kun mayong Awit sa Comunion)

Bugtakan an saimong kamot, asin midbidon mo an mga lugar kan mga pako, asin dai ka magkulang nin pagtubod, kundi magtubod, allelúia.

Pamibi Pakacomunion

P — Mamibi kita.

O Diós na makakamhan, itugot mo, nakikimaherak kami, na an pakasabot kan sacramento pascual padagos na magdanay sa samong mga isip. Huli ki Cristo samong kagurangnan.

B — Amen.

RITO SA PAGT APOS

Solemneng Bendicion

P — An Kagurangnan mapasaindo.

B — Asin sa saimong espiritu.

P — Magduko kamo sa pagbendicion.

Bendicionan kamo kan Diós na makakamhan, huli kan solemnidad kan pascua ngonian, asin kaherakan kamong surogon sa mga paghipa kan gabos na kasàlan.

B — Amen.

P — Asin, siyang nagsulit saindo sa buhay na daing kasagkoran huli kan pagkabuhay-liwat kan Bogtong niyang Aki, panoon kamo kan mga premio nin buhay na daing kasagkoran.

B — Amen.

P — Asin, mantang tapos na an mga aldaw kan pasion kan Kagurangnan, kamong nagcecelebrar kan mga kaogmahan kan fiesta pascual, huli kan saiya man sanang pagtabang, makaabot na nagrorokyaw an mga kalag, sa fiestang ini na sine-celebrar sa kaogmahan sagkod pa man.

B — Amen.

P — Asin an bendicion kan Diós na makakamhan, Amâ, asin Aki, ✠ asin Espiritu Santo, maghilig asin magdanay saindo sagkod pa man.

B — Amen.

P — Lakaw kamo sa katoninongan ni Cristo.

B — Salamat sa Diós.

LITANIA NIN PASASALAMAT PAKATAPOS KAN PANDEMIANG COVID-19

P — Magdolok kita sa Kagurangnan, na minabâgo kan gabos, para sa gabos niatong inakong balaog asin biyaya kan panahon nin pandemia-Covid. Sa lambang pag-arang, kita gabos masimbag:

S — Salamat sa Diós.

1. Sa pagpagiromdom samo kan kaluyahan nin buhay, sa pagampon samo kan mayo nang nangangahas na maglindong samo asin sa pagbukas kan samong mga isip sa tunay na kaipuhan sa buhay, kita magpasalamat sa Kagurangnan. **(S)**
2. Sa pagtugot samo na makisumarô na may pagtubod asin pagkamoot sa lambang sarô, dawa na ngani kami siniblag nin huli kan kahelangan, magpasalamat kita sa Kagurangnan. **(S)**
3. Para sa isog-boót kan mga naghatod samo nin tabang na científico, social asin espiritual dawa sa tahaw nin mga peligro asin humâ sa saindang buhay, magpasalamat kita sa Kagurangnan. **(S)**
4. Para sa balaog kan mga bâgong tugdas na bulong asin bakuna laban sa virus asin an natural na pagsugpò kan paglakop kaini, magpasalamat kita sa Kagurangnan. **(S)**
5. Para sa balaog nin danay na presencia, kan kami napupurisaw asin naghohorasa, namumundô asin nagsolo-solo, siring man kan nawâran nin paciencia kan panahon nin pandemia, magpasalamat kita sa Kagurangnan. **(S)**

P — Mamibi kita.

Mamomoton na Diós, dai kaming inisip na dai mo aram. Daing luhang pinabulos niamo na dai mo pinagmakulugan Mayo kaming maogmang pigcecelebrar na bâgo sa saimo. Naglaog ka sa samong kinaban nin kahelangan, pagtios asin kagadan asin aram mo an samong katakotan na inaatubang. Akoa an samong pasasalamat huli kan saimong mamomoton na pagmangno sa panahon kan COVID-pandemia. Siring kan saimong pagtangis sa pagkagadan ni Lazaro, hangosan mo man kan hinangos kan buhay na daing kasagkoran an gabos na nagadan huli kan coronavirus. Ginibo mong kaogmahan samong katakotan huli kaini kami nagpapasalamat asin nag-oomaw saimo. Sa saimo an kamurawayan ngonian asin sagkod pa man.

P — Nuestra Señora de Peñafrancia,

B — **I pamibi mo kami.**

P — San Miguel Arcangel,

B — **I pamibi mo kami.**

P — **(Santo/a patron/a kan parokya o comunidad),**

B — **I pamibi mo kami.**

P — Divino Rostro,

B — **Kaheraki kami.**

 **sambanwá**
GIYA SA PAGESAMBA KAN BANWAAN NIN DIÓS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID,** Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy.
Ciudad nin Naga, Pilipinas • 2023

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**